



### **Cuntschet da protecziun Sosa/Sarinera Zernez - surdatta da lavur**

Cuntschaintamaing han las grondas ovaziuns da la fin d'avuost chaschunà gronds dons vi da las scarpadas dal En (vers ost) sül perimeter Zobrist Cotti srl fin dadour la sarinera Zernez. Per pudair cuntinuar cullas masüras d'urant il 2024 es gnüda surdatta la progettaziun e las lavurs d'indschegner a la ditta WNT Ingenieure GmbH, San Murezzan.

### **Tagls da laina 2024 - surdattas da lavur**

Tenor plan da gestiun e plan da lavur annual sun preparats pel 2024 tagls da laina per surdar ad impressaris forestals e tagls chi vegnan manats tras in collavuraziun culs impiegats da cumün. Ils tagls da laina sun gnüts surdats a las seguintas dittas indigenas: AlbertinForst a Martina, Bott imp. for. SA a Valchava e Janett Tschlin SA a Tschlin.

### **Mia Engiadina - MENSA (Mia Engiadina Network SA) – prolungaziun credit d'impraist**

Dal 2018 vaiva concess la suprastanza cumünala a la MENSA (Mia Engiadina Network SA) ün credit d'impraist sainza fit per tschinch ons. Il gremi ha uossa prolungà sün dumonda il credit d'impraist per ulteriurs tschinch ons, fin als 31 december 2028.

### **Viafier Retica - gestiun binari da s-chamgia Muglinè – permiss extraordinari**

Il gremi respunsabel ha acconsenti a la Viafier Retica ün permiss extraordinari davent dals 8 fin ils 14 avrigl 2024 per gestir il binari da s-chamgia in Muglinè eir illas uras da not. I's tratta da lavurs impossiblas da realisar d'urant il di in connex culla fabrica i'l tunnel Brailtunnel II.

### **Sustegn finanziel – Scoul Classics**

La suprastanza cumünala ha acconsenti a la società Scoul Classics üna contribuziun per la 9avla Sinfonia da Ludwig van Beethoven chi varà lö prosma stà.

### **Ordinaziun da taxas – approvaziun revisiun 2024**

In seguit a diversas decisiuns d'adattamaints vi da las taxas cumünalas ha la suprastanza cumünala approvà l'ordinaziun da taxas e d'impostas. Ils müdamaints pertoccan las taxas d'attachs al provedimaint electric, l'imposta fundiaria e l'imposta sün chans. Las novas tariffas valan a partir dals 1. schner 2024. Pro l'imposta fundiaria vala quist adattamaint resalv l'approvaziun a la votaziun a l'urna dals 3 marz 2024.

### **Taxas proceduras da fabrica - disposiziuns d'execuziun - approvaziun**

Causa cha las taxas da fabrica actualas nu sun adequatas al temp d'hoz e cun quai cha la revisiun da la ledscha da fabrica es amo in elvauraziun, ha la suprastanza cumünala approvà las novas disposiziuns d'execuziun per taxas da proceduras da fabrica chi valan a partir dals 1. schner 2024.

### **Termins 2024**

L'agenda da termins 2024 es gnüda approvada. D'urant il 2024 as fa quint cun quatter radunanzas cumünalas, 24 sezzüdas da la suprastanza cumünala e cun 24 sezzüdas da la direcziun operativa. Implü varà lö ils 24 schner 2024 üna conferenza da presidents per societats, clubs e gruppaziuns dal Cumün da Zernez.

### **Il Cumün da Zernez ha acconsenti ils seguints permiss da fabrica:**

Parcella no. 1018, Besio Fadri e Rosanna, Zernez – tet sur üna part da la piazza

Parcella no. 1203, Scandella Corsin ed Ilda, Zernez – tet sur üna part da la terrassa

Parcella no. 1248, Patscheider Christian, Zernez – rimplazzamaint lingia d'aua da baiver

Parcella no. 2478, Leu Alexander James e Barbara, Susch – ingrondimaint abitaziun

Parcella no. 3037, Sutter Barbara e von Arx Michael, Lavin – restructuraziun Chasa no. 54, müdamaint da proget

Parcella no. 3102, Campell Ladina e Steiner Andri, Lavin – pompa da chalur

Parcella no. 3474, Bisaz Arno, Lavin – fabricar oura tablà cun 3 abitaziuns